

北京舊志彙刊

〔康熙〕
順天府志

三

順天府志卷之三目錄

建置

沿革

城池

公署

學校

壇壝

廟寺

郵舍

關梁

[illegible]

建置類小言

清朝創造，冠軼百王。經營畿輔，制更精詳。綜覈今古，儀型四方。因時沿革，名實相當。列墉鑿塹，靡不金湯。官署學校，蔚煥封疆。壇壝整肅，各有祀禳。琳宮梵宇，氣象嚴莊。傳分郵舍，行設關梁。仰瞻帝都，瑞靄當陽。志建置類。

沿革

順天府

古冀州域，顓頊高陽氏所都。畿內曰帝丘，北至於幽陵。陶唐爲幽都。有虞氏析爲二，衛水

以南爲并州，燕以北爲幽州。夏、商復爲冀州。武王克商，封堯後於薊，封召公奭於燕，復析爲幽、并。春秋、戰國俱爲燕地。秦并天下，以燕爲漁陽、上谷二郡。漢元鳳初，改爲廣陽郡。東漢罷郡，復立幽州。三國魏爲燕國。晉曰范陽國。後魏於薊立燕郡，復置幽州，領之。北齊於幽州置東北道。後周改置燕郡范陽，立總管於幽州。隋曰安樂郡、涿郡。唐開元曰范陽郡。石晉天福元年，割幽、薊十六郡，以報契丹援立之功。契丹升幽州爲南京幽都府，後改幽都爲析津府，號燕

京。宋宣和中，改析津府爲燕山郡。遼仍析津府，金爲大興府，元初仍大興府。至元初，改屬大都路。明洪武初，設北平布政使司，改大興府爲北平府。永樂中，改北平府曰順天府，定爲京師。領州四、縣二十三。正德八年，升昌平爲州。國朝定鼎因之。順治十六年，灤縣省入通州。康熙十五年，升遵化爲州。領州六、縣二十。

大興縣

本秦薊縣地，屬上谷郡。漢至唐皆仍舊名。遼改爲析津縣，金改爲大興縣，元、明仍舊。國朝

因之。縣治在北城教忠坊。

宛平縣

秦、漢、隋皆薊縣地，唐析西界置幽都縣，即顓頊所都帝丘地也。遼改爲宛平縣。釋名曰：「燕，宛也。取宛宛然以平之義。」金、元、明仍舊。國朝因之。縣治在北安門西積慶坊。

良鄉縣

春秋戰國時，燕中都地。西漢爲良鄉縣，東漢爲廣陽縣，晉屬范陽國。元魏屬涿郡，北齊省入薊縣，尋復置。隋屬涿郡，唐時以不從安史之

「注一」「後魏省」三字原本在「屬幽州」句後，據《明一統志》改正。

叛，改名固節，尋復名良鄉。遼、金、元、明仍舊名。明永樂屬順天，國朝名屬因之。在府西南。

固安縣

本漢方城縣，李牧伐燕，取方城是也。屬廣陽國，後魏省。「注一」隋置固安縣，屬幽州。唐初屬北義州。貞觀初，復屬幽州。金屬涿州，元屬霸州，後升爲固安州。明洪武初，仍改爲縣。國朝因之。在府城西南。

永清縣

本漢益昌郡。東漢及梁、陳皆廢。隋開皇

中，於今縣西五里置通澤縣，尋廢。唐垂拱三年，改爲武隆縣。景雲元年，改會昌縣。天寶初，始改今名。自此歷至宋、元及明，皆曰永清。永樂屬順天。國朝因之。在府城南。

東安縣

漢名安次，初隸燕國，後屬渤海郡。宣帝更名東安。晉復屬燕國。隋屬涿郡。唐高祖隸涿郡，武德四年，移置石梁城。貞觀八年，又移置魏常道城。開元二十三年，又東移於耿就橋行市南。元初，屬霸州，後升爲東安州，隸大都路。明

洪武初，改爲縣。二年，因渾河爲患，遷於常伯鄉張李店，即今治也。隸順天府。國朝因之。在府城南。

香河縣

古泉州地，屬冀。唐仍之，虞析冀爲幽、并，此屬幽。夏、商仍屬冀。周屬燕。秦、漢隸漁陽。晉屬燕。隋屬涿。唐屬幽。石晉賂契丹後，尋屬遼，遂置香河縣，屬析津府。金、元俱屬大興府。明隸順天府。國朝因之。在府城東南。

通州

秦屬漁陽郡地。漢置潞縣，故城東南八里，王莽置有通潞亭。後魏置潞郡。隋廢入涿郡。唐武德初，置玄州，尋復爲潞縣。五代及遼皆因之。金升爲通州，取漕運通濟之義。元、明俱仍舊名。永樂改北平府爲順天府，通州首隸焉。領三河、武清、漷、寶坻四縣。迨我國朝，仍明之舊。順治十六年，省漷入州。其餘三邑，隸屬如故。在府城東。

三河縣

本漢臨洶縣地。唐貞觀元年，省臨洶入幽

州。景龍三年，改臨洶爲三河。宋、遼因之。金升潞爲通州，乃以三河屬焉，隸大興府。元仍之。明洪武改大興爲北平，永樂改北平爲順天府，仍以三河隸順天之通州。國朝因之。縣名三河者，以地近洶河、鮑丘河、洳河三水也。在州城東。

武清縣

本漢雍奴地，隸漁陽郡。雍奴，藪澤之名，四面有水曰雍，水不流曰奴。建武二年，封冠恂爲侯國。《魏志》：張郃從擊袁譚於渤海，兵圍雍奴。謂此邑也。晉屬燕國。隋屬涿郡。唐屬

幽州。天寶初，改爲武清縣。五代、宋、金皆因之。元初屬大興府，尋割隸漷州。明改屬通州。國朝因之。在州城南。

寶坻縣

漢名泉州，屬漁陽。唐屬范陽。石晉賂契丹，隸香河縣。金立爲縣，命名寶坻，謂其地產魚、鹽、蘆葦，故曰寶。又水中高地，故曰坻。尋升爲盈州，後復爲寶坻縣。元隸大都路。明隸順天。國朝定鼎，其隸如故。在通州東南。

涿州

〔注一〕「水」原本爲「永」，據《明一統志》改。

秦爲上谷郡地。漢置涿郡。三國魏改爲范陽郡。晉曰范陽國。南北朝魏復爲范陽郡。隋爲涿郡。唐廢郡爲范陽縣。大曆中，置涿州。宋改涿水郡。〔注二〕遼置永泰軍。金、元皆復爲涿州。明以范陽縣省入。國朝因之。領縣一，在府城西南。

房山縣

本良鄉、宛平、范陽三縣地，石晉以其地遺遼，未有縣。金析置萬寧縣，以奉山陵，因改爲奉先縣。元以近大房山，遂改房山縣。明因之。國

朝仍因之。在州城西北。

薊州

燕惠王時，初置漁陽郡，即此。秦、漢仍爲漁陽郡地。河北前趙及慕容燕并都之。三國及晉俱屬幽州。隋大業初，復置漁陽郡。唐開元十八年，始立薊州。宋置尚武軍。遼改廣州軍。金屬中都路。元仍爲薊州，隸大都路。明仍爲薊州，以漁陽縣省入。國朝因之。領縣二，在府城東。

玉田縣

本春秋無終子國。漢爲無終縣，屬右北平。

元魏屬漁陽郡。唐開元十八年，改名玉田縣。以漢陽雍伯種石得玉，故名。神龍初，屬營州，後改屬薊州。五代周仍舊。宋爲經州，金復爲玉田縣。元、明因之。國朝仍因之。在州城東。

平谷縣

漢高帝始名平谷，屬漁陽郡。唐廢爲大王鎮。金復爲平谷縣。元屬薊州。明因之。國朝仍因之。在州城西北。

遵化州

春秋無終國之域。漢爲右北平之境。唐於

此置馬監及鐵冶，居民稍聚，因置遵化縣。宋改灤州郡。遼爲景州清安軍。金以縣隸薊州。元、明皆因之，并設三衛一所。國朝初年，衛所俱并屬縣。康熙十五年，升爲州，轄縣一，曰豐潤。在府城東。

豐潤縣

春秋爲無終國地。唐開元間，析玉田縣之永濟務爲薊州縣，隸北平郡。金始置豐潤縣，隸廣州軍，以古豐州、潤河合而名之。元省入玉田縣，尋復置，隸薊州。明因之。國朝仍因之。在州城